


Brev da cumiau a Serafin Cavegn

Prezian Serafin

Igl ei dumengia endamaun, ils 23 d'uost 1998. Jeu vi festginar ed esser ad uras per far a Ti ina viseta, ei fetschi prescha. Duront solver audel il tun lamentont dil zenn da bara. Memia tard da visitar Tei e dir enzacons plaids. A mi resta aunc quella via, la davosa, per tonscher maun e dir engraziel fetg. Mes plaids d'engraziament exprimel segiramein era en num da Tia famiglia, da numerus parents, amitgs ed enconuschents.

Avon 22 onns ei Ti turnaus da Breitenbach anavos en Tia patria carezada. E Ti eis semess en da curascha, sco sche



Ti havesses da refunder enzatgei muncuentau. Ti has realisau in tschuat per Tei e Tia famiglia, mo era stuiu acceptar enqual streh atras il quen. E tuttina, ins ha giu l'impressiun che nuot possi stermentar Tei e Tia ernerzia daventava magari lu aunc pli furiusa.

Sper Tia travaglia eis Ti era s'engaschaus per la cultura, la politica ed il turissem. Tiu temperament furibunt e Tias ideas innovativas eran beinduras - per biars da nus buca lev da capir e suandar. Perduna, igl ei daventau senza malart! Mo ti sas crer, ussa mauncas Ti, Ti che scurlavas, devas magari cul marti grond, vulend destadar ils pacifics.

Ti eis era staus da bien cor, has susteniu generusamein la cultura e specialmein culla Musica da Sedrun has ti propi fatg da padrin. Tias visetas a Tes figliols musicants, Tes buns cussegls, Tiu agid e sustegn mauncan daveras a nus. Ussa savein nus mo aunc giavi-

schar a Ti la pagaglia da Diu.

Ina da Tias ideas che cuntinua ei bein l'Uniu da viandonts Tujetsch. Ti eis staus iniziant ed has schau ora cups. Oravontut ils bauns postai sper las sendas, representan Tiu idealissem e dattan perdetga d'in ferm engaschi. Il staunchel viandont sa bien grau persuenter e franc retscheivas Ti enqual bien patratg ni oraziun.

Ti has bandunau nus culla ferma perschuaioni da mo ir a nus ordavon. Tia ferma cardientscha seigi a nus in muos-savia e porti a nus levgera da cuntinuar e suandar. Tgisa, sche Ti retscheivas nus leusi cun ina da Tias tratgas famusas, cun in bien sitg ni sco guid tras vias e sendas. In di, nus sevesein e Ti vegns a beneventar nus cun in grazius surrir.

Car Serafin, ruaussa en pasch.

Beni Hendry